



**PERUTUSAN DATUK BANDAR
MESYUARAT MAJLIS BIL. 2 /2021
30 MAC 2021 (14 SYA'BAN 1442H)**

BISMILLAHIRRAHMANIRRAHIM

Assalamualaikum WBT dan Salam Sejahtera.

1. Alhamdulillah, syukur ke hadrat Ilahi di atas limpah kurnia-Nya, kita semua dapat menghadiri Mesyuarat Majlis pada edisi kali ini. Saya ingin mengucapkan terima kasih kepada semua Ahli Majlis, Ketua Jabatan, pegawai serta warga kerja Majlis Bandaraya Petaling Jaya di atas kerjasama dan komitmen yang diberikan kepada Majlis khususnya di dalam merealisasikan segala perancangan program dan perkhidmatan.

Segala pencapaian dan kejayaan pastinya menuntut komitmen yang jitu selain semangat kerja berpasukan. Saya juga mengharapkan agar tanggungjawab yang digalas dapat dipertingkatkan seiring dengan visi dan misi Majlis.

Perkhidmatan Majlis Bandaraya Petaling Jaya termasuk proses permohonan daripada pelanggan sepanjang tempoh Perintah Kawalan Pergerakan (PKP) akan terus dilaksanakan dengan amalan norma baharu dan pematuhan terhadap Prosedur Operasi Standard (SOP) yang dikeluarkan oleh Majlis Keselamatan Negara.

Oleh yang demikian, saya memohon kerjasama semua pihak agar dapat menyediakan perkhidmatan yang terbaik buat warga Petaling Jaya.

2. PIHAK BERKUASA TEMPATAN KERAP 'TURUN PADANG'

Selaras dengan arahan YAB Perdana Menteri Malaysia, menyeru semua Pihak Berkuasa Tempatan lebih kerap turun ke lapangan bagi meninjau dan memahami masalah kakitangan yang bertemu dengan orang ramai bagi menyelesaikan urusan seharian.

Penularan COVID-19 tidak harus menjadi penghalang dalam usaha kerajaan memperkasakan sektor awam ke arah perkhidmatan yang lebih cekap, telus dan mesra rakyat. Kakitangan awam perlu membudayakan norma baharu dalam cara kerja supaya perkhidmatan dapat disampaikan secara efektif kepada golongan sasaran.

Dalam meneruskan agenda ini, kerajaan menekankan inisiatif untuk menambah baik aspek integriti dan tadbir urus termasuk melalui usaha membanteras rasuah. Oleh kerana PBT antara warga kerja barisan hadapan yang sering terdedah dengan tarikan rasuah, maka usaha membanteras jenayah ini perlu kekal sebagai agenda penting.

Harus diingatkan, kita telah dipertanggungjawabkan menjaga keperluan masyarakat termasuklah memastikan sosial dan kesejahteraan seperti kemudahan awam, perumahan, keadaan sekeliling tempat tinggal dan sebagainya.

Selain itu, kita juga turut berperanan memerangi wabak COVID-19 yang kini sedang melanda seluruh negara. Kita juga perlu komited menjaga Petaling Jaya dalam pelbagai aspek.

MBPJ harus mengekalkan kecemerlangan dalam perkhidmatan seperti tahun-tahun sebelum untuk memastikan Petaling Jaya terus menjadi sebuah bandar raya yang lebih baik daripada yang lain dan menyahut arahan YAB Perdana Menteri untuk memberikan perkhidmatan yang terbaik.

3. PENJAJARAN SUMBER KERAJAAN

Selaras dengan hasrat Kerajaan dalam melakukan penjajaran sementara kesemua sumber dan fasilitinya termasuk kakitangan awam berikutan pelaksanaan Ordinan Darurat, Majlis Bandaraya Petaling Jaya menyahut saranan Kerajaan dengan penggunaan optimum aset di bawah seliaan Majlis seperti kenderaan jabatan, aset atau fasiliti dan kakitangan Majlis. Ini bertujuan bagi menyokong kelancaran operasi perkhidmatan kritikal agar lebih bersepadu dan terselaras. Antara pelaksanaan MBPJ yang menyokong saranan kerajaan ini adalah seperti berikut :-

- i. Dewan Serbaguna Kg. Lindungan di PJS 6 dijadikan sebagai pusat ujian COVID-19 saringan bersasar komuniti.
- ii. Melaksanakan Tanggungjawab Sosial Korporat dengan menjahit pakaian perlindungan diri (PPE) dengan kerjasama Fakulti Seni Lukis Dan Seni Reka, Universiti Teknologi MARA (UiTM) Shah Alam.
- iii. Penghasilan pelindung muka atau *face shield* secara "Do it yourself" (DIY) oleh kakitangan Jabatan Penguatkuasaan untuk diserahkan kepada agensi yang memerlukan. Sebanyak 2500 unit

pelindung muka telah berjaya disediakan untuk kegunaan petugas barisan hadapan.

- iv. Kakitangan Majlis dari pelbagai Jabatan turut terlibat dalam aktiviti membantu menangani masalah pandemik COVID-19 bersama agensi lain seperti melaksanakan sanitasi di kawasan dan bangunan-bangunan awam.
- v. Melaksanakan pemantauan dan penguatkuasaan bagi premis-premis atau individu yang melanggar Prosedur Operasi Standard (SOP).
- vi. Melaksanakan penggiliran kerja yang sistematik bagi kakitangan dalam memastikan perkhidmatan perbandaran yang disediakan tidak terjejas.

Selaras dengan gaya hidup, suasana dan norma baharu ini, saya menyeru agar semua Ketua Jabatan, pegawai dan semua warga kerja MBPJ terus komited dalam menjalankan tugas-tugas selari dengan hasrat dan usaha Kerajaan dalam melaksanakan penjajaran semua sumber Kerajaan dapat dioptimumkan sepenuhnya. Selain itu juga, ianya bagi menyokong kelancaran perkhidmatan Majlis yang menyeluruh demi memastikan kehendak penduduk dapat dilaksanakan dengan sebaiknya.

4. MAJLIS BANDARAYA PETALING JAYA ANGKAT MARTABAT WANITA

Dalam membangun tadbir urus sesebuah organisasi dalam bidang pengurusan dan pentadbiran, peranan golongan wanita sangat penting. Pembabitan golongan wanita dalam kepimpinan adalah sangat signifikan dalam mencapai setiap sasaran dan matlamat pembangunan mampan yang memerlukan keterlibatan semua pihak. Sumbangan wanita dari pelbagai aspek kehidupan seperti ekonomi, sosial dan politik juga dilihat begitu dominan dewasa ini.

Penyertaan wanita dalam setiap peringkat pada era masa kini semakin membanggakan. Hal ini, jika dilihat setiap lapisan kepimpinan negara, keterlibatan golongan wanita dalam mempelbagaikan dan merencanakan pertumbuhan sektor pembangunan negara dalam menghasilkan suatu keputusan yang positif selain dapat meningkatkan produktiviti amat tinggi.

Tema Hari Wanita pada tahun ini, **Wanita Bangkit Mendepani Cabaran** amat bertepatan dengan peranan wanita dalam pelbagai bidang di sektor awam mahupun swasta juga dilihat mampu untuk menstabilkan dan membentuk persekitaran yang dinamik dan kondusif yang menjadi nilai tambah kepada organisasi yang diwakili.

Menyedari situasi ini, Kerajaan telah merangka pelbagai strategi yang khusus dalam menambah variasi peranan wanita dengan cara yang lebih berkesan dalam proses pembangunan supaya potensi wanita dapat dioptimumkan. Usaha yang gigih perlu diambil bagi membantu wanita untuk terlibat secara aktif dalam kegiatan-kegiatan sosial dan ekonomi yang utama. Ia sekali gus, menterjemahkan segala usaha pembangunan supaya kepentingan dan penyertaan wanita dapat

diintegrasikan sumbangan mereka ke arah proses pembangunan negara maju.

Majlis Bandaraya Petaling Jaya tidak terkecuali mengangkat peranan wanita di setiap peringkat. Bermula di peringkat kepimpinan tertinggi sehinggalah ke kumpulan sokongan, peranan wanita di Majlis menjadi nilai tambah kepada kecemerlangan dan kegemilangan yang ditempa Majlis di peringkat antarabangsa dan nasional. Setiap 8 Mac saban tahun, Majlis tidak terkecuali mengiktiraf Sambutan Hari Wanita. Pengiktirafan ini mencerminkan kesungguhan Majlis untuk meningkatkan lagi penyertaan wanita dalam pembangunan secara lebih berkesan, sistematik dan penuh nilai integriti yang tinggi.

5. MEWUJUDKAN SUDUT KOLEKSI KEMUDAHAN BRAILLE DI PERPUSTAKAAN KOMUNITI PETALING JAYA

Bagi mewujudkan peluang sama rata kepada semua golongan pengguna perpustakaan, Perpustakaan Komuniti Petaling Jaya (PKPJ) telah mengambil inisiatif untuk mewujudkan sudut koleksi buku braille khusus untuk golongan Orang Kelainan Upaya (OKU) penglihatan.

Kemudahan ini adalah bertujuan untuk menyediakan bahan bacaan khusus kepada golongan buta penglihatan agar budaya membaca ini terus disuburkan dalam kalangan mereka dan tidak membiarkan mereka rasa terpinggir ketika mengunjungi PKPJ.

Buat masa kini, pihak perpustakaan sedang berusaha untuk mendapatkan koleksi buku-buku braille ini daripada beberapa pembekal. Pihak perpustakaan juga telah mengadakan lawatan kerja ke KL Braille Resources dan juga Pusat Pembelajaran Kejiranan Presint 9 bagi mempelajari dan meninjau perkhidmatan yang disediakan khusus

untuk OKU buta penglihatan. Selain itu, PKPJ juga turut mengadakan perbincangan lanjut dengan pihak-pihak berkepentingan bagi

memastikan koleksi braille ini menepati keperluan dan kehendak golongan kelainan upaya, buta penglihatan kelak.

Diharapkan agar dengan adanya koleksi braille ini akan dapat memberi manfaat dan nilai tambah kepada golongan buta penglihatan untuk terus menggunakan perkhidmatan yang ditawarkan oleh pihak perpustakaan khususnya dan pihak MBPJ amnya.

6. **MBPJ BANGUNKAN SISTEM ecoRELOVED**

Majlis Bandaraya Petaling Jaya melalui Unit Teknologi Maklumat dan Jabatan Pengurusan Sisa Pepejal dan Pembersihan Awam telah bergabung untuk membentuk kumpulan KIK yang diberi nama Wastech.

Kumpulan ini telah membangunkan **Sistem ecoReloved** yang berfungsi untuk menguruskan barangan terpakai secara atas talian yang diterima melalui sumbangan perseorangan dari masa ke semasa atau melalui program Spring Cleaning. Barangan terpakai ini akan dibaiki semula (upcycle) oleh Bahagian 3R sebelum direkodkan di dalam sistem untuk tujuan inventori dan seterusnya diiklan untuk tujuan jualan dengan harga yang lebih rendah atau diderma kepada golongan B40 melalui Program Jalinan Kasih 3R PJKITA.

Sistem ini boleh dicapai melalui pautan <https://ecoreloved.mbpj.gov.my>. Melalui pautan ini, tuan/puan juga boleh memberikan penilaian dan pandangan untuk penambahbaikan di menu rating yang disediakan di dalam sistem.

Diharap Sistem ecoReloved ini memberi manfaat kepada tuan/puan dan penduduk Petaling Jaya dalam usaha Majlis merealisasikan misi

Melaksanakan Agenda Perbandaran Pintar, Mampan, Berdaya Tahan, Dinamik Menerusi Tadbir Urus Cepak, Berkesan dan Peduli Komuniti melalui Pelan strategik MBPJ 2021-2025 yang telah dirancang. Sistem ecoReloved ini dilaksanakan berdasarkan Teras 3 iaitu **“Memperluaskan Penggunaan Teknologi ICT dan Aplikasi Dalam Semua Aspek Pengurusan dan Perkhidmatan Perbandaran”**.

Sekian, terima kasih.